



Jumat, 22 April 2022
Ogen: Kuan-kuanen 3:19-22



Kegeluhon Senang Dingen Dame



Tinapa Dibata simbelang enda tuhu-tuhu mehuli ras mejile kerina. Deleng-deleng si meratah, kerangen-kerangen si mbuniken rudang-rudang ras kegeluhen si mehuli, lawit meratah si mbelang kerina mehuli ras erbahan ukur jore. Emaka labo mamang ateta gundari kalak ndarami ingan gawah-gawah lanai ku Mall ntah kota-kota besar. Lawes kalak si wisata alam, puncak 2000, danau Toba, Labuan Bajo, Raja Ampat, rsd. Sebab tinepa Dibata e seh kel jilena. Tapi sada rahasia, kujapa pe kita labo lit kemalemen ate situhu-tuhu, kegeluhen senang dingin dame labo itentukan ingan, barang ntah kelimpahen material. Kitab Kuan-kuanen tuhu ncidahkan maka alam si mehuli mejile enda Tuhan kap nepasa alu kepentarenNa. Emaka simehuli e kita tading ngenanamisa naring, banci nge erbahanca pusuhta e ermengkah dingin jore. Tapi sada kunci kegeluhen ras kengasupen ngenanami pemere Dibata e, emakap bas ayat. 21 *"ula kel sirangken kepentaren ras pemeteh, ula pulahi pe"*. Kata pemeteh ras kepentaren ijenda iertiken pertimbangan ras kebijaksanaan, jadi intina pusuh ras perukuren ije me pusat dame ras senang ukur e. Kuasa guna kita banci ngaturken pusuh ras ukurta tetap ratur, seimbang ras positif eme sinigelari kebijaksanaan. Janari banci si dat kuasa e, eme arah persadanta ras Tuhan. Ia si mada kuasa. Adi sipindo baNa tentu iberekenNa, adi si latih makeken kuasaNa e, tentu lit dampakna bas geluhta.

Jadi, adi ateta nggeluh senang ras dame, labo arus ndauh kel kita lawes. Sekelewetta enda kuh kel tinepa Dibata. Ajari pusuh ukur ngatakan bujur man Dibata. Maka iteruh langit e pe kita, sangana cio-cio teruh sinuan-sinuan e, itemani kopi ntah teh manis, janah ndengkeh lagu rohani e, ije pe malem ateta. Adi pusuhta dem pengatakan bujur ras sukacita, ija pa pe kita nanamna bagi I surga.